

## Il Jo da Damal

ina paraula en e cun consequenzas

Igl era ina giada,  
en questis dis,  
ch'igl è capità,  
ch'il **Jo da Damal**,  
che ensemes cun blers auters lavurus ed  
undraivels abitants da Damal  
lavura per la sanadad, per la natira, per il  
clima, per l'ambient, per ina buna economia e per il  
bainstar general  
e che tuts ensemes sa dostan er cunter ils tissis agrars  
che ruineschan la sanadad, la natira, il clima ed il  
bainstar general,



igl è damai capità  
ch'il **Jo da Damal** e ses undraivels  
abitants da Damal  
han survegnì ina nauscha sentenzia  
giudiziala,  
amez sin lur chaus ed en lur cors.  
Durant ch'il **Jo da Damal** seseva sin  
ses stgabè  
e ponderava la sentenzia absurda  
e na la digeriva betg, ma la vuleva  
tuttina excretar,  
ha quai tuttenina cloccà vi da ses isch.

**Il Jo da Damal** ès ì davant chasa.

Là stevan dus uffants da Damal davant el.

"**Jo da Damal**",

èn sa lamentads ils dus uffants  
charins,

"char **Jo da Damal**, nus avain  
udì che las pussanzas stgiras e  
quels, dals quals nus na  
dastgain betg dir il num, che  
quels dastgan ussa tissientar  
nossas plazzas da giugar...",  
e larmas grossas als èn currids  
giu da lur vistas charinas.

"Noss geniturs han ditg, che nus  
na dastgian betg pli giugar sin  
nossas plazzas da giugar,

perquai ch'igl è vegnì scumandà giudizialmain a noss  
president communal Uli da proteger la sanadad da ses  
burgais.

Il tribunal di: El na dastga betg relaschar in reglament  
da distanza che pudess evitar ch'ils tassis agrars da las  
pussanzas stgiras e da quels, dals quals ils numbs na  
dastgan betg vegnir numnads, sa tschentan sin nossas  
plazzas da giugar!

Char **Jo da Damal**",

èn sa lamentads ils dus chars uffants,

"co duai quai cuntinuar?

Nua duain nus anc giugar?

Nua pudain nus anc currer enturn libramain e rir  
libramain e rudlar en l'erva verda? Nua?



Sche tissis agrars sa tschentan dapertut sin noss' erva,  
 en noss ierts, sin nossas plazzas da giugar? Nua?"  
 "Chars uffants",  
 ha lura ditg il **Jo da Damal**  
 ed ha tutgà ses vegl cor da cumbattant,  
 "chars uffants,  
 igl è il sontg duair da nus creschids  
 da pertgirar e da proteger vus uffants!  
 Nus vegnin a cumbatter ed a betg ceder  
 per vus e per nus e per il mund entir!  
 Nus vegnin vinavant ad engaschar nus –  
 enfin che nus avain persvadì da lur  
 ingiustia ils tribunals, las pussanzas  
 stgiras e quels, dals quals ils numbs na  
 dastgan betg vegnir numnads,  
 per che nus tuts, tut ils umans da quest mund,  
 er quels, dals quals ils numbs na dastgan betg vegnir  
 numnads,  
 possian viver ensemens  
 en in ambient saun  
 ed en pasch."



Lura ha il **Jo da Damal**  
 prendì sia mantella magica  
 ed è sgulà cun ils uffants sur  
 la Pastgira da Damal  
 mirvegliusa ed anc intacta.  
 Els han fatg girs da  
 protecziun magics sur ella vi  
 ed enturn ella ed els han  
 clamà ils vegls sontgs

champesters s. Martin, s. Wendelin, ils sontgs Flurin e Luzius, sco er il s. Nicolaus per ch'els gidian tiers da proteger lur patria  
sco er il mund entir  
da l'engurdientscha e dals tissis da las pussanzas stgiras e da quels, dals quals ils numbs na dastgan betg vegnir numnads.

Il Vent sura da la Pastgira da Damal ha sientà las larmas  
dals pitschens uffants  
e consolads èn els sgulads tar els a chasa.

La saira èn ils chars uffants plain fidanza ids a letg.

Els han anc scutinà:

"La "**Via da Damal**" ed il "**Jo da Damal**" èn simplamain cool..."

E lura han splerins, artgs s. Martin e stailinas prendì els en ina sien profunda.

